

# **Жаннатга аввал кирадиганлар**

22:54 / 01.12.2016 13105

*Анас розияллоҳу анҳудан ривоят қилинади:*

**«Набий соллаллоҳу алайҳи ва саллам:**

**«Мен жаннатга шафоат берувчи биринчи одамман. Мен набийлар ичида энг эргашувчиси қўпиман», дедилар».**

Шарҳ: Пайғамбар соллаллоҳу алайҳи ва салламнинг жаннатга шафоат беришлари жаннат эшигини очишга воситачилик қилишлари ёки баъзи осийларни жаннатга киритишга воситачилик қилишларидир. Ана ўша шафоатни бериш учун Пайғамбар соллаллоҳу алайҳи ва саллам биринчи бўлиб жаннатга кирадилар. Шу билан бирга у зотнинг умматлари бошқа пайғамбар алайҳиссаломларнинг умматларидан кўп бўлади.

*Яна ўша кишидан ривоят қилинади:*

**«Набий соллаллоҳу алайҳи ва саллам:**

**«Мен қиёмат куни набийлар ичида энг эргашувчиси қўпиман.**

**Жаннат эшигини биринчи қақадиган одам менман», дедилар».**

Шарҳ: Демак, Муҳаммад соллаллоҳу алайҳи ва саллам биринчи бўлиб жаннатга кирадилар.

*Яна ўша кишидан ривоят қилинади:*

**«Набий соллаллоҳу алайҳи ва саллам:**

**«Мен жаннатдаги аввалги шафоатчиман. Модомики мен тасдиқланмас эканман бошқа бирор набий тасдиқланмас. Набийлардан бир набий бор. Уни ўз умматидан бир кишидан бошқаси тасдиқ қилмайди», дедилар».**

*Яна ўша кишидан ривоят қилинади:*

**«Набий соллаллоҳу алайҳи ва саллам:**

**«Қиёмат куни жаннат эшигига келиб очишларини сўрайман. Бас, хозин:**

**«Сен кимсан?!» дейди.**

**«Муҳаммадман!» дейман.**

**«Сенга амр қилинганман. Сендан олдин ҳеч кимга очмайман», дейди», дедилар».**

Ушбу тўрттани Муслим ривоят қилган.

*Саҳл ибн Саъд розияллоҳу анҳудан ривоят қилинади:*

**«Набий соллаллоҳу алайҳи ва саллам:**

**«Албатта, менинг умматимдан жаннатга етмиш минг ёки етти юз минги киради. Бир-бирларини тутган ҳолларида. Уларнинг охиргилари кирмагунча аввалгилари ҳам кирмайди. Уларнинг юzlари бадр кечасидаги ой каби бўлади», дедилар».**

Икки шайх ривоят қилган.

## **ЖАННАТГА ҲИСОБСИЗ КИРАДИГАНЛАР**

*Ибн Аббос розияллоҳу анҳудан ривоят қилинади:*

**«Набий соллаллоҳу алайҳи ва саллам:**

**«Менга умматлар кўрсатилди. Бас, бир набий ўта бошлади. У билан бирга бир уммат бор эди. Бир набий ўтди. У билан нафарлар бор эди. Бир набий ўтди. У билан ўн киши бор эди. Бир набий ўтди. У билан беш киши бор эди. Бин набий бир ўзи ўтди. Назар солсам, жуда кўп қора кўринди. Шунда мен:**

**«Эй Жиброил! Анавулар менинг умматимми?» дедим.**

**«Йўқ. Лекин сен уфққа назар сол!» деди.**

**Қарасам, жуда катта қора кўринди. Шунда у:**

**«Ана ўшалар сенинг умматинг. Уларнинг олдиларида етмиш мингтаси бор. Улар ҳисоб ҳам, азоб ҳам қилинмаслар», деди.**

**«Нима учун?» дедим.**

**«Улар қуидириш ила даволанмас, дам солдирмас, фол очдирмас эдилар ва Роббиларига таваккал қиласар эдилар», дедилар.**

**Шунда Укоша ибн Михсон туриб у зотнинг олдиларига бориб:**

**«Аллоҳга дуо қилинг! Мени ўшалардан қилсин!» деди.**

**«Эй Аллоҳим! Уни ўшалардан қилгин!» дедилар.**

**Кейин бошқа бир киши туриб:**

**«Аллоҳга дуо қилинг! Мени ҳам ўшалардан қилсин!» деди.**

**«Унга Укоша сенда ўзиб кетди», дедилар».**

Икки шайх ва Термизий ривоят қилган.

Шарҳ: Саҳобаи киромлар Пайғамбаримиз соллаллоҳу алайҳи васалламдан бир оғиз бўлса ҳам сўз эшитиш, ўз илмларини ортдиришга жуда ҳам зўр иштиёқли эдилар. Бу мақсад йўлида улар турли услубларни қўллар эдилар. Аксар ҳолларда масжиди набавийда ўтириб У зотни ҳужраи саодатдан чиқишлиарини кутар эдилар.

Пайғамбаримиз соллаллоҳу алайҳи васаллам ҳам бу нарсани яхши билганлари учун иложи борича саҳобаларга кўпроқ таълимотларни етказишига ҳаракат қиласар эдилар.

Ушбу ҳадиси шарифда у зот қиёмат куни бўладиган баъзи бир ҳодисалар ҳақида ахборот бермоқдалар. Унда турли набийлар турли ададдаги умматлари ила ўтганлари баён қилинмоқда. Уларнинг ичидаги Муҳаммад соллаллоҳу алайҳи ва салламнинг умматлари энг кўп эканлиги таъкидланмоқда. Шу билан бирга Муҳаммад соллаллоҳу алайҳи ва салламнинг умматларида етмиш минг киши ҳисоб китобсиз ва азоб уқубатсиз тўғридан тўғри жаннатга киришлари айтилмоқда ва уларнинг бу баҳтга элтувчи сифатлари ҳам зикр қилинмоқда.

«Улар куйдириш ила даволанмас, дам солдирмас, фол очдирмас эдилар ва Роббилирига таваккал қиласлар эдилар».

Демак, жаннатга ҳисобсиз кирадиганлардан бўлиш учун тўрт сифатга эга бўлиш керак экан;

### **1-«куйдириш ила даволанмаслик»**

Бунда ҳам, баъзи яраларига тамға қиздириб босиб даволагандаги жоҳилиятдаги каби, тамға қиздириб босиш шифо берди деган, Аллоҳ таолога ширк келтиришдан иборат бўлган эътиқодни қилмаслик кўзда тутилган.

### **2-«дам солдирмаслик»**

Яъни, жоҳилиятнинг ширқдан иборат дам солишини талаб қилмайдиган, Ислом ижозат берган дам солишини ўз-ўзидан шифо беради деб эътиқод қилмайдиган, балки, шифо Аллоҳ таоло томонидангина бўлади, деган эътиқодда бўладиган.

### **3-«фол очдирмаслик»**

Яъни, фалон нарса бўлди, энди ёмонлик етса керак. Пистон нарса кўринди, у шумқадам эди, энди ишлар чатоқ, каби эътиқодларни қилишдан йироқ бўлиш керак. Бу дунёдаги барча яхшилик ҳам, ёмонлик ҳам фақатгина Аллоҳ таолонинг иродаси ила бўлади, деган қатъий ишонч билан яшаш керак.

### **4-«Роббилирига таваккал қиладиган»**

Ҳамма нарсада фақат Аллоҳ таологагина суннадиган.

Ана ўша тўрт сифатни ўзида мужассам қилган киши жаннатга ҳисобсиз кирадиган етмиш минг киши ичидаги бўлар экан. Пайғамбаримиз соллаллоҳу алайҳи васалламдан бу улкан башоратни эшитгандан кейин ҳамма ўзи ҳам ўша саодатманд кишилар ичидаги бўлишини орзу қилиб қолди ва...

«Шунда Укоша ибн Михсон туриб у зотнинг олдиларига бориб:

«Аллоҳга дуо қилинг! Мени ўшалардан қилсан!» деди.

Яъни, мен ҳам ўша жаннатга ҳисобсиз кирадиган етмиш минг киши бўлайин.

«Эй Аллоҳим! Уни ўшалардан қилгин!» дедилар.

Кейин бишінан бир киши туриб:

«Аллоҳга дуо қилинг! Мени ҳам ўшалардан қилсін!» деди.

«Унға Укоша сенда ўзиб кетди», дедилар».

Яъни Укоша розияллоху анху ўзининг ўша етмиш минг киши қаторида бўлишини тилаб Пайғамбаримиз соллаллоху алайҳи васалламдан дуо сўраган. У зот дуо қилганлар. Ижобат соати бўлгани учун дуолари дарҳол қабул бўлган. Кейинги сўраган одам ўша соатдан кеч қолгани учун унга дуо қилмаганлар.

Ривоятларда бу одам ким эканлиги ҳақида маълумот йўқ. Эҳтимол, сўрови мувофақиятсиз чиққанидан хижолат бўлмасин деб номи зикр қилинмаган бўлса керак.